



Inatsisartunut ilaasortaq Knud Kristiansen Atassut
MAANI

Upernavimmi tunitsiveqarnermi pissutsit pillugit apeqqummut nr. 2010-139 akis-
sut.

Inatsisartut suleriaasianni § 36, immikkoortoq 1, naapertorlugu Naalakkersuisu-
nut apeqquteqarputit paasiniarlugu aalisartut tunisisarnermi pitsaannerusumik atu-
gaqalernissaanut Naalakkersuisut qanoq pilersaaruteqarnersut. Apeqqut uanga
Naalakkersuisoqarfinit akineqartussanngorlugu innersuuneqarsimavoq.

Imatut apeqquteqarputit:

Naalakkersuisut Upernavimmi eqqaanilu tunisisarnermi pissutsit maan-
nakkut ulikkaartoortarnertik pissutigalugu matusaqattaartut iliuseqarfi-
giniarpaat, ilaatigut umiarsuarnik tunitsivilerusuttut akuersissummik tu-
nillugit?

Tunngavilersuut:

Upernaaq mannamiit Upernaviup illoqarfiani Upernaviullu eqqaani nunaqarfinni
tunitsiveqarfiusuni aalisartut ajornartorsiortitaasorujussuupput, tunitsiviit piffis-
sani arlalinni matusaqattaarmata, uninngatitsivinni ulikkaartoortarnertik allatigullu
ajornartorsiuteqarneq tunngavilersuutigineqarlutik. Ajornartorsiut uteqattaartuar-
toq aaqiivigineqartariaqarpoq, aalisartut aasaanerani aningaasarsiorfigilluarta-
gaanni piffissaq sivikitsoq atorlugu aalisarsinnaanerit naleroruttortoq tunitsivinni
aaqqissuussinerlunnerit pissutigalugit aningaasarsiorniarnanni annertuumik
ajornartorsiortinneqarmata.

Apeqqummut akissut:

Apeqqutigisannut akissutit ilisimatitsissutigisinnaavara Aalisarnermut, Piniar-
nermut Nunalerinermullu Naalakkersuisoqarfik ukioq manna ilaatigut Upernavik
Seafood A/S-imit, Qeqertaq Fish ApS/Uummannaq Seafood A/S-imit kiisalu aa-
lisartuq Henrik Sandgrenimit Upernaviup eqqaani aqutsivigineqartumi umiarsua-
liinissamik qinnuteqaatinik tigusaqarsimammat.

Henrik Sandgrenip qinnuteqaataani takuneqarsinnaavoq aalisartut kissaatigigaat
Kullorusuup/Nussuup eqqaani pisat Upernaviup eqqaani aqutsivigineqartumi
nunami tunisassiorfinnut assartorneqartarnissaat kissaatigineqartoq.

Nalilerneqarsimavoq aalisakkanik nipsisallu suaanik assartuinissamik akuersissu-
teqartoqarneratigut aalisartut orsussamut aningaasartuutsigisartagaat appartinne-
qarsinnaassasut, nammineerlutik nunami tunitsivinnut assartuisarunnaarnermik-
kut. Taamatut aaqqisoqarneratigut suaat/aalisakkat tunitsivinnut akigissaartitsi-

24. Juni 2010
Sagsnr. 2010-033090
Dok. Nr. 404339

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nanoq.gl
www.nanoq.gl

nerpaanut assartorneqartalersinnaassapput Taamaattumik nalilerneqarpoq taamatut assartuisoqartalernissaanik akuersissuteqarnissaq aalisartut soqutiginerussa-gaat.

Qeqertaq Fish ApS aamma Uummannaq Seafood A/S-imit qinnuteqaammi taku-neqarsinnaavoq taamatut aaqisoqarneratigut Upernaviup eqqaani qaleralinnik tunisisarneq ajornartorsiorfiulissasoq, pisat tunineqartarnissaat eqqarsaatigalugu angallatinik assartuutunik amerlanerusunik eqqussisoqanngippat. Ilutigalugu nali-lerneqarpoq nunami tunisassiorfiit pisanut sanilliullugit tunisassiassaaleqilissa-sut, tamannalu umiarsuarnik tunitsiviliisoqaqqinneratigut ikorfartorneqarsinnaa-sasoq.

Tamatuma saniatigut nalilerneqarpoq Uummannaq Seafood A/S aamma Qeqer-taq Fish ApS-ip annertunerusumik suleqatigiisinneqarneratigut tunisassiorfiit a-torluarneqarnerusinnaassasut taamaasillutillu aalisakkat pisarineqartartut ator-luarneqarnerulerlutik.

Tamakku nalilersoreerlugit aalajangerpunga Henrik Sandgren aamma Qeqertaq Fish ApS/Uummannaq Seafood A/S angallatinik assartuutunik umiarsualiinissa-mullu akuerineqassasut.

Upernavik Seafood' A/S'ip tunisassiorfiutigisumik umiarsualiinissamik qinnute-qaataani tunngavilersuutigineqarpoq taavani nunami tunisassiorfiit naammattu-mik tigooraasinnaannginnerat ikiorserniarneqartoq, Nuussuarmi tunitsivissap sa-naneqarnerata kinguartoornerata kingunerisaanik.

Upernavik Seafood A/S-ip ukiuni arlaqalersuni nunami tunitsiviup sananeqarne-rata kinguartoornera qinnuteqartariaqalerminut tunngavilersuutigisarpaa. Kingul-lermik 2008-imi umiarsuuaatileqatigiit umiarsuarmik tunisassiorfiutigisumik u-miarsualiinissaminnut akuerineqarput Taamaattumik nalilerneqarpoq taamatut tunngavissarsiortarneq akuerineqarsinnaajunnaartoq.

Ilutigalugu nalilerneqarpoq taamatut umiarsualiisoqaqqinneratigut tunisassiorfiit sippulimmik piginnaasaqalersinnaasartut, taamaasillunilu Upernaviup, Uum-mannap Diskobugtimilu sinerissap qanittuani qaleralinniarniq sippulimmik i-ngerlanneqalersinnaalluni. Aalisaqassuseq eqqarsaatigalugu ilanngullugu naliler-neqarpoq sinerissap qanittuani qaleralinniarnermi umiarsualeeqinnissaq piu-juaannartitsinissaq eqqarsaatigalugu illersorneqarsinnaanngitsaq. Tamatuma sa-niatigut nalilerneqarpoq taavani nunami tunisassiorfiit tunisassiorsinnaanermik-kut piginnaasaat naamareersoq.

Tamanna tunngavigalugu aalajangerpunga Upernavik Seafood A/S-ip qinnute-qaataa akuerineqassanngitsaq.

Apeqqustillinerpit kingunerisaanik allaffeqarfimma Upernavik Seafood A/S atta-veqarfigaa paasiniaarlugu umiarsualiinissamik itigartitaanertik taavani tunitsive-qarnernut kingunerlutsisisimanersoq.

Upernavik Seafood A/S nalunaarpoq Upernaviup eqqaani ingerlatsivigineqartumi ukioq manna tunisineq ulluni arlalissunnguani unitsinneqartariaqarsimasoq toqqorsiviit ulikkaartoornerisa kingunerisaanik. Upernavik Seafood A/S naapertorlugu tamatumunnga pissutaasoq ataasiinnaavoq tassalu Royal Arctic Line A/S-ip nioqqutissianik assartuisinnaassusaata killeqarpallaarneranik, taavani assartuinermini umiarsuaq PAJUTAAT atorneqarmat, ukiup takeqisup ingerlanerani tunisassiarineqarsimasunik assartuinissaminut naammangitsoq. Umiarsuaq VESTLANDIA massakut taavaniissimalereerpoq tamatumalu kingunerisaanik nioqqutissiat toqqortatigineqartut annertuumik ikileriarsimapput, tunisinerlu tunitsivinni tamani ingerlanneqaqqilerluni. Kalaallit Nunaanni Aalisarsinnaanermut Nakkutilliisoqarfiup (KANUAANA) nalunaarutigineqarsimasut naapertorlugit uppernarsarsinnaavaataaq piffimmi aqutsivigineqartumi tunitsivinnut tamanut tunisisoqarsinnaasoq.

Tamatuma saniatigut Upernavik Seafood A/S-ip naatsorsuutigaa Nutaarmiuni tunitsivik 2010-m,i julip aallartissimalernerani ammarneqassasoq, Qeqertarsuup tuanit Ummannamillu angallatinik amerlanerusunik taavunga aalisariartoqarnissaa naatsorsuutigineqarmat. Tamatuma saniatigut Kangersuatsiami Upernavik Kujallermilu ingerlatsineq 1. juli 2010 missaani aallartissangatinneqarpoq, tamatuma kingunerisaanik taavani qerititerisinnaanerit annertuumik qaffariaatseqasapput.

Nuussuarmi aalisakkerivissaq siuliani taaneqartoq inuussutissalerimut aqutsisoqarfimmit misissorneqarlunilu atorsinnaanissaanut akuerineqarsinnaasangatinneqarpoq 2010-mi augustusip aallartissimanerani, taamaasilluni aalisakkerivik tunitsivigineqarsinnaalerluni.

Upernavik Seafood A/S-ip naliliinera naapertorlugu suliniutit tamakku kingunerisaanik taavani ullup unnuallu ingerlanerani aalisakkat qerititerneqarsinnaasut 80-90 tonsit missaaniissapput, Upernavik Seafood A/S naapertorlugu piginnaasat pisariaqartinneqartunit annertunerujussuusut. Piginnaasalli taamak annertutiginnissaat pisariaqarpoq tunitsivigineqartartut imminnut isorartussusaat eqqarsaatigalugit. Tassa imaappoq Upernavik Kujallermit Kullorsuarmut nunami aalisakkerivinnut tunisinissamut periarfissaqartariaqarmat.

Ilanngullugu oqaatigineqassaaq Halibut Greenland Upernaviup eqqaani ingerlatsiviusumi umiarsuarmik tunitsiviliinissaminik qinnuteqarsimammattaaq, itigartinneqarlunili Upernavik Seafood-ip itigartinneqarneranut tunngavilersuutit assigninik tunngaveqartumik. Ingerlatseqatigiiffiup itigartinneqarnini naammagittaallitigisimavaa, tamatuma kingorna Aqutsisoqarfiup piumasaraa Nuussuarmi tunitsivissap qaqugu ammarneqarnissaanut uppernarsaatini nassinneqarnissani. Tamannali naammattumik uppernarsarneqarsinnaasimangilaq, taamaattumillu tamanna aalajangernermut allanngortitsinissamut tunngavigineqarsinnaanani. Taamaattumik umiarsualiinissamik itigartitsineq attatiinnaarpoq.

Qanittukkullu paasivara Upernavik Seafood-ip tulaassuisiorfissaa Nuussuarmiit-tussaagaluartoq naammassinneqarsimangitsoq suliaqarnissamullu piareeqqangitsoq, tamannarpiarlu pissutigalugu Halibut Greenland Upernavimmi tunitsiviusumik umiarsuaqalernissaa akuerinikuuvara.

Pissutsit tamaasa eqqarsaatigalugit isumaqarpunga Upernaviup eqqaani ingerlat-siviusumi naammattumik tunitsivissaqarnissaq qulakkeerniarlugu nungusaataan-ngitsumik aalisarnissaq inuussutissarsiornikkullu soqutigisat oqimaaqqatigiissu-mik isiginiarneqarsimasut, tassani pineqarlutik umiarsuit tunitsiviit, umiarsuit assartuutit nunamilu tunisassiorfiit.

Periarfissaq iluatsillugu erseqqissaatigissavara qinnuteqaatit tamarmik sukumii-sumik suliarineqartarmata aammalu taavani pissutsit malinnaaffigeqqissaarakkit. Taamaattumik nunami tunitsiviit naammakkunnaartutut nalilerneqarpata, nuna-milu immamilu tunisassiorfiit amerlineqarnissaat pisariaqartinneqalerpat taman-nalu aalisagaqassuseq eqqarsaatigalugu illersorneqarsinnaappat umiarsualeqqin-nissamut ammaassisinnaanissannut piareersimavunga..

Inussiarnersumik inuulluaqqusillunga



Ane Hansen



10. maj 2010

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

Apeqqut: Naalakkersuisut Upernavimmi eqqaanilu tunisisarnermi pissutsit maannakkut ulikkaartoortarnertik pissutigalugu matusaqaqqaartut iliuseqarfiginiarpaat, ilaatigut umiarsuarnik tunitsivileerusuttut akuersissummik tunillugit?

(Inatsisartuni ilaasortaq Knud Kristiansen, ATASSUT)

Tunggavilersuut:

Upernaaq mannamiit Upernaviup illoqarfiani Upernaviullu eqqaani nunaqarfinni tunitsiveqarfiusuni aalisartut ajornartorsiortitaasorujussuupput, tunitsiviit piffissani arlalinni matusattaarmata, uninngatitsivinni ulikkaartoormerit allatigullu ajornartorsiuteqarneq tunggavilersuutigineqarlutik. Ajornartorsiut uteqattaartuartoq aaqqiivigineqartariaqarpoq, aalisartut aasaanerani aningaasarsiorfigilluartagaanni piffissaq sivikitsoq atorlugu aalisarsinnaanerat naleroruttortoq tunitsivinni aaqqissuussinerlunnerit pissutigalugit aningaasarsiorniarnanni annertuumik ajornartorsiortinneqarmata.

Inussiarnersumik inuulluaqqusillungaa

ATASSUT sinnerlugu Inatsisartuni ilaasortaq

Knud Kristiansen